

繡刻玉玦

記定本

目錄

第一齣 標題

第二齣 賞春

第三齣 博弈

第四齣 送行

第五齣 接詔

第六齣 訪友

第七齣 憶夫

第八齣 入院

第九齣 行刺

第十齣 祝壽

第十一齣 報信

第十二齣 賞花

第十三齣 設誓

第十四齣 擄掠

第十五齣 定計

第十六齣 訪姨

第十七齣 投賢

第十八齣 截髮

第十九齣 赴試

第二十齣 觀潮

第二十一齣 對策

第二十二齣 改名

第二十三齣 接望

第二十四齣 傳旨

第二十五齣 夢神

第二十六齣 擄忠

第二十七齣 侵南

第二十八齣 交兵

第二十九齣 商嫖

第三十齣 渡江

第三十一齣 索命

第三十二齣 陽勘

第三十三齣 詔封

第三十四齣 陰判

第三十五齣 宿廟

玉玦記 目錄

第三十六齣 團圓

四

玉玦記

明 鄭若庸 著

第一齣 標題

〔月下笛〕〔末上〕 日月跳丸。黃花綻了。幾番重九。英雄袖手。阻風雲。困圭竇。閒將五色胸中線。雜組懸河辯口。貴坐間談虎。懔然神變。試教露袖。和璧悲瑕垢。恨紅殞啼花。翠眉顰柳。揚州夢覺。是非一笑何有。從來敏德多畦徑。爲看盤銘在否。這優孟諷諫。君聽取。謾嘲悠謬。〔問答照常〕

〔滿江紅〕鉅野王生。閱閱裔。腹胞琳球。長安下第羞歸去。向狹邪游。薄倖娼樓。懲虎穴。多情才子。敝貂裘。遇呂公館穀向芸窗。還自修。降虜將。成畔謀。統胡騎。陷神州。把令妻秦氏。繫作俘囚。婦守三從甘毀面。夫終一舉占鰲頭。拜封重會癸靈廟。作話留。

戒烟花傾家殞命。

表貞烈截髮毀容。

臨安郡書生雪恥。

癸靈廟玉珎重逢。

第二齣 賞春

〔逍遙樂〕〔生扮王商上〕靜裏光陰好。槩戟門庭春至早。浮名於我等鴻毛。文抒

日采。志擬崧高。氣壓江濤。〔生〕〔鷓鴣天〕家世章平身業文。金貂文武襲餘芬。直教執袴能傳

緒。未許楊袁競策助。詞倒峽。氣凌雲。待將長劍學從軍。狂來醉墨縱橫甚。書破羊欣白練裙。卑人王

商。表字說濟。世家鉅野。皇朝學士禹禰之後。先君王粉。官拜戶部侍郎。母封沛國。不幸俱喪。朱輪華

轂。未墜家聲。黃卷青箱。請存世業。念良弓之子。恥不爲箕。履既留之餘。慚非肯構。安敢望河汾之譽。

且幸免平泉之譏。妻房秦氏慶娘。荆襄鎮撫秦貞之女。德性幽柔。工容閒冶。慎周南蘋藻之職。兼衛

女衣裳之能。正是室家攸宜。琴瑟靜好。青春無事。欲往郊外遊賞一番。且待娘子出來。試問則個。

〔旦扮秦氏上旦〕

〔遶地遊〕春眠乍曉。處處聞啼鳥。問開到海棠多少。〔生〕章臺路渺。何處無芳

草。想甚日遊還到。〔旦〕昨夜鳥聲春。驚鳴動四鄰。〔生〕今朝芳樹下。定有詠花人。〔旦〕官人萬福。

〔生〕娘子拜揖。〔旦〕官人。流光迅速。纔過元宵。不覺花朝至矣。〔生〕你看紅入桃花。青歸柳色。真個好風景也呵。

〔集賢賓〕〔生〕青歸柳葉顰尙小。春容漸入庭皋。綺羅餘寒驚料峭。看映日檐花迎笑。朱門靜悄。簾幕上紅塵不到。〔合〕琴瑟好。何處是玉京瑤島。

〔前腔〕〔旦〕彤光影徹芳砌曉。幽禽獨語紅條。飛去花枝空嫋嫋。正粉蝶黃蜂爭鬧。蛾眉淡掃。似窈窕河洲匹鳥。〔合〕琴瑟好。何處是玉京瑤島。

〔琥珀貓兒〕〔生〕尋芳車馬。應已遍西郊。處處吹笙醉碧桃。紅樓十二倚春嬌。明朝好趁佳辰。辦取遊鑣。

〔前腔〕〔旦〕韶華逝水。屆始在春宵。蠹簡螢窗莫憚勞。董帷經史夜焚膏。明朝好趁天風。直上青霄。〔生〕娘子。乘此春明。小生欲待整理鞍馬。踏青遊衍。意下如何。〔旦〕官人。

豈不聞縱欲敗度。積學成身。君當努力青雲之業。上繼祖武。豈可無事漫游。玷辱家聲。況且今年大比。何不上京赴選。圖個顯親揚名。卻不是好。〔生〕娘子言之極當。即便治裝。卜日啟行。〔旦〕如此恰

好。

〔簇御林〕〔旦〕君才氣倚馬豪。吐虹蜺。星斗高。荆山何事空懷寶。振書香再把箕裘紹。〔合〕免遊遨。驅車上國。雲水路迢遙。

〔前腔〕〔生〕司唐制。珥漢貂。料天池。有鳳毛。泥封方下徵賢詔。絕南溟未許神魚誚。〔合〕免遊遨。驅車上國。雲水路迢遙。

〔生〕聖學工夫惜寸陰。

〔旦〕且從無逸戒荒淫。

〔合〕從今獻賦甘泉去。

不信無媒魏闕深。

第三齣 博弈

〔光光乍〕〔丑上〕生不荷鋤犁。觸處落便宜。算來都只爲蠅頭利。受盡了他人閒嘔氣。〔丑〕自家臨安城中一個浪子解幫閒。家無二頃田。口有三寸舌。走動處花林錦陣結交的。酒友博徒。念幾句落斬真言。饒你漢張飛。終難跳過。奉一個迷魂太歲。由他楚屈原。不得獨醒。九里

山陣圖。比俺縱橫的圈套。五丈原妙算。輸俺駁行白機關。許人話捉影追風。騙人財探囊取物。〔笑

介〕說甚麼萬法皆通。只落得一貧如洗。饒君縱有千般計。命裏無時莫強求。自家一生專好幫閒鑽熟。這幾日全沒買賣。有個管喜員外。是個大財主。極要嫖賭。待尋俺結義哥張鬼熟同去。賺他幾兩銀子。呀。卻早望見張哥來了。〔末上〕

〔醉落魄〕終朝糊口無恆計。求魚緣木竟何濟。閒心欲與海鷗期。知甚日忘機。

〔末〕出去般般足。歸來日日貧。一生都是命。半點不由人。〔丑〕哥哥拜揖。〔末〕兄弟拜揖。〔丑〕哥哥。這幾日不見你。卻元來去做賊來。〔末〕那有這話。〔丑〕你纔說出去搬一搬就足。歸來十日又貧了。卻不是做賊的勾當。〔末〕不是。我平生專靠幫閒掇賺。每日出去尋着個貴游公子。喫的用的穿的。都趁了他的。這是般般足了。將得些家來。又不勾用。卻不是日日貧的。〔丑〕有理有理。外有餘而內不足。堂堂乎張也。我的受用與哥哥不同。〔末〕且說喫的。〔丑〕魚鼈膾鯉。嘉肴大具。熊掌雞蹄。猩脣燕脾。每食三萬般。猶云無下筯。〔末〕好好。只怕你食而不知其味。〔丑〕那裏得到口。每日街坊上遇着尙食監。賜飯與大官人家。打我身邊過。被我一嗅。都打從鼻子裏去。其實聞而知之。〔末〕又道是風來餅裏香。穿的如何。〔丑〕雉襦狐白。具文蛟梭。冰蠶獨繭。羔羊五紵。縞袂宜紈素。輕衫厭綺羅。

〔末〕好好。只怕你服之無數。〔丑〕那裏得上身。我的兄弟是個裁縫匠。每日出去。人家做了些綾羅錦繡。家來說長說短。都被我聽了。卻像是我的一般。這是耳熱於絢。〔末〕又道如聞裂繒聲。用的如何。〔丑〕大具南金。驪珠璞玉。玄龜象齒。朽貫腐粟。鐘乳三千兩。胡椒八百斛。〔末〕好好。只怕你爲富不仁。〔丑〕那裏得入手。我家對門開典庫的。但見了的便家來與妻兒說。至今還說不盡。這是開口見錢。〔末〕又道隨何舌。在是黃金。且莫閒說。這兩日有些生意沒有。〔丑〕便是不濟。如今答喜員外。京城中第一個財主。專好花酒賭博。揮金如土。我和你到他家裏。只說你要賭錢。設個計兒。哄他些銀子。卻不是好。〔末〕承挈了。〔行介丑叫介〕答員外在家麼。〔淨上〕

〔光光乍〕〔淨〕寶炬照蛾眉。花蕊亞簾衣。日高丈五時方纔起。鸚鵡忽傳聲聞

客喜。〔淨〕京華游俠兒。由來富斂基。金多賤於土。揮霍鬼可欺。手不把書卷。身不攬戎衣。春來日日。出服御何輕肥。朝從博徒飲。暮有娼樓期。指廩償酒債。堆金選蛾眉。聲色狗馬外。其餘一無知。自家答喜。夜來賞花醉了。今早起遲。不知甚人來到。呀。解大哥。〔末丑云〕員外拜揖。〔淨〕二位拜揖。此位是誰。〔丑〕湧金門外張兄。個儻多能。尤善博奕。〔淨〕貴表。〔末〕混名張鬼熟。〔淨〕久聞久聞。〔丑〕員

外。張兄久慕高風。今日一來拜望。二來欲與員外弈。不知可否。〔淨〕最好最好。待我去取一千兩銀子來。〔末丑〕不要許多。〔淨〕少也得五百兩纔勾。我去我去。〔末〕兄弟。我兩人沒一文在此。怎麼好。〔丑〕不必多說。自有道理。〔淨〕博奕從來慣。輸贏總未真。解兄。銀子在此。張兄有多少。〔丑〕張兄才帶五百兩銀子來。隨從的馱了跟不上。少間便到。員外且借一百兩與我們應手。〔淨〕使得。〔與銀介末丑接介淨〕把甚麼賭。〔丑〕張兄善圍棋。〔淨〕圍棋也好。賭一百兩。〔丑〕只好五十兩。〔淨〕也罷。就只賭五十兩。〔取棋枰介〕

〔皂羅袍〕落子聲遲瑤砌。看身如蜩甲。兀化難移。宣城得守。木云奇。淮淝破敵。方爲喜。〔丑〕員外輸了。〔合〕雌雄勝負。兵家怎期。盈虧得喪。天心有機。何妨百萬輸。劉毅。〔淨〕圍棋不好。解兄。我與你打雙陸。百兩一注。〔丑〕這也好。〔淨〕取雙陸來。〔取雙陸打介〕

〔前腔〕〔丑〕再把樗蒲閒理。歎點籌。帝子。作鑿宮闈。馬箠未毀。莫言歸。豬奴枉。諛尤堪戲。〔淨〕我雙陸不高。又輸了。將去將去。〔合〕雌雄勝負。兵家怎期。盈虧得喪。天心有機。何妨百萬輸。劉毅。〔末〕既然如此。我與員外擲骰子。再賽一百兩。〔淨〕這個又好。〔丑〕

取骰子來〔擲介〕

〔前腔〕〔末〕莫詫咸陽客里。且狂呼博賽。五白稱宜。玉纖深裏憶名姬。緋衣驟躍驚純雉。〔丑〕張兄勝了。〔淨〕與你銀子將去。〔合〕雌雄勝負。兵家怎期。盈虧得喪。天心有機。何妨百萬輸劉毅。〔淨〕不信偏我會輸。拿象棋來。我與張兄一局。就這一百五十兩作孤注賭了罷。〔末〕就是就是。

〔前腔〕〔淨〕車馬森然成勢。儼鴻溝楚漢。犄角相持。沈機告捷井陘。神姦入夢邯鄲騎。我又輸了。都將去。〔合〕雌雄勝負。兵家怎期。盈虧得喪。天心有機。何妨百萬輸劉毅。〔淨〕你二位且住。我再取一千兩與你賭一賭。〔丑〕員外。天色已暮。愚弟兄告回。明日再來相陪。〔淨〕不可失信。

〔淨〕花影庭階日易晡。

〔丑〕一番清話又成虛。

〔末〕等閒百萬逢場戲。

〔合〕莫問家無擔石儲。

第四齣 送行

〔一翦梅〕〔生旦同上〕膏車秣馬起長征。莫訴離情。添我離情。〔旦〕攬衣推枕聽雞聲。欲問登程。怕問登程。〔生〕海棠風外獨沾巾。千里雲霄未致身。〔旦〕忽見陌頭楊柳色。安排青眼送行人。官人萬福。〔生〕娘子拜揖。〔旦〕官人聞說今日起程。未知真否。〔生〕行李已具。即日便行。〔旦作悲介〕伉儷之愛。情不能舍。功名之事。義不可留。教奴家如何是好。〔生〕小生此行。功名成否。不過半載。即便回家。不須煩惱。〔旦〕春英將酒過來。〔丑〕悽悽命盃酒。言餞千里遊。行人雖念路。爲爾暫淹留。酒在此。〔旦遞酒介〕

〔三學士〕〔旦〕閱閱蟬聯知有幸。扶搖好薦鵬程。當思貽穀三槐在。莫負還鄉駟馬行。〔合〕飲餞臨岐心耿耿。歸來後喜氣生。

〔前腔〕〔生〕青鏡孤鸞愁舞影。〔旦〕官人須是頻頻寄書。〔生〕書封雁足難憑。憐余尙惜牽衣別。慰子終朝佩印行。〔合〕飲餞臨岐心耿耿。歸來後喜氣生。

〔前腔〕〔丑〕待價藏珠未可輕。一朝持獻明廷。碧山肯爲移文恥。白馬終看奉詔行。〔合〕飲餞臨岐心耿耿。歸來後喜氣生。〔生〕不須酒了。小生就此起程。〔旦〕官人因

慕軒冕之榮。故割房幃之愛。暫然去眼。寧不傷心。莫戀章臺。不思故國。妾有玉玦。贈君佩之。若得成名。決須早回。勿使妾有白頭之歎。〔生〕玉玦在身。如覩卿面。勿庸多囑。斷不淹留。就此拜別。〔拜科〕

〔香柳娘〕〔生〕念匆匆遠行。念匆匆遠行。含悲自省。天涯已在須臾頃。〔旦〕我愁煩倍增。我愁煩倍增。鴻跡等浮萍。銀瓶怯修綆。〔合〕聽陽關淚傾。聽陽關淚傾。殷勤渭城。不堪孤另。

〔前腔〕〔旦〕想淒涼怎生。想淒涼怎生。綺羅春靜。枕花紅泣鴛鴦並。〔生〕怕清宵漏永。怕清宵漏永。繡被擁雞聲。梨花月痕冷。〔合〕聽陽關淚傾。聽陽關淚傾。殷勤渭城。不堪孤另。〔生〕白首螢窗未見招。越山無路水迢迢。〔旦〕自從車馬出門去。便入空房守寂寥。〔旦下生弔場〕傷離復傷離。別後增鬱紆。戚戚意不伸。轉顧仍踟躕。不知馬在何處。王便那裏。〔未挑行李上〕迢遞京華道。蒼茫日暮天。馬在此。請官人便行。〔做行科〕

〔香柳娘〕〔生〕把金鞦乍整。把金鞦乍整。滿前孤興。馬蹄香散飛花徑。聽嚶嚶鳥鳴。聽嚶嚶鳥鳴。芳草最關情。萋萋織烟暝。〔合〕想臨安玉京。想臨安玉京。雙

龍紫庭。紅雲遮映。

〔前腔〕〔末〕歎驅馳未寧。歎驅馳未寧。蒼蒼暮景。垂楊古渡黃塵迥。望炊烟已青。望炊烟已青。樵斧隔林聲。斜春半村影。〔合前〕

〔生〕問酒依山館。

〔末〕相將慰旅愁。

〔合〕應時還得見。

勝似覓封侯。

第五齣 接詔

〔西地錦〕〔外上〕戎馬關河雲擾。戮力誓滅天驕。一封未下彤庭詔。目斷魏闕峒。〔外〕建牙吹角不聞喧。亂世登壇衆所尊。家散萬金酬士死。身持一劍答君恩。下官姓耿。名京。

山東人氏。少諳韜略。起自草萊。不幸遭值胡虜猾夏。犬羊充斥。中原板蕩。乘輿播遷。邇來倡義起兵。志圖匡復。手下將士總管張安國。勇敵萬人。可當韓信。監軍辛棄疾。才稱七步。不亞陳琳。被吾殺敗。金酋猛安。奪了東平府。假稱刺史。攝守此邦。已曾遣監軍到臨安上表。不見回來。不免叫總管試問。聲息如何。〔叫介〕淨扮張安國上。蓮花穿劍鐔。明月掩刀環。坐待空沙漠。功成閉玉關。覆元帥。有何

鈞旨。〔外〕這幾日金兵消息如何。〔淨〕聞得金人南侵至揚子江。被虞允文殺敗了。〔外〕可喜可喜。如今辛監軍臨安上表。待他回來。聞知大駕行在整廩人馬。大進勤王。

〔賞宮花〕〔外〕鸞輿望遙。櫂槍照夜高。枕戈圖國計。擐征袍。〔合〕拜爵可期班定遠。成功不數霍嫖姚。

〔前腔〕〔淨〕宮牆野蒿。咸陽王氣消。一射聊城箭。恥兒曹。〔合〕拜爵可期班定遠。成功不數霍嫖姚。

〔前腔〕〔丑〕羣胡正驕。風塵入混淆。三軍張武旆。逞英豪。〔合〕拜爵可期班定遠。成功不數霍嫖姚。〔外〕張總管。且到教場演習軍馬。〔淨應介〕得勝莫忘戰。居安當慮危。〔淨下〕
末扮辛棄疾上

〔西地錦〕〔末〕龍袞得瞻天表。轅門又睹旌旄。馬蹄歷遍關山道。塵土染盡征袍。此間已是帥府。不免逕入。〔外〕辛監軍回來了。〔末拜云〕元帥久違帳下。無任惓惓。〔外〕監軍。途路風霜。多有生受。此去事情若何。〔末〕容稟。